

- 1' Wer nit kan sprechen ja vnd neyn
- 2' Vnd pflegenrott vmb groß vnd kleyn
- 3' Der hab den schaden jm alleyn

Kap. 8



Nitt volgen gutem ratt.

- 1 Der ist eyn narr der wiß will syn
- 2 Vnd weder glympff / noch moß düt schyn
- 3 Vnd wenn er wißheyt pflegen will
- 4 So ist eyn gouch syn fåderspyl /

- 5 Vil sint von worten wyse vnd klüg  
 6 Die ziehen doch den narren pflüg  
 7 Das schafft das sie vff jr wißheyt  
 8 Verlossen sich vnd bschydikeyt  
 9 Vnd achten vff keyn frömden ratt  
 10 Biß jn vnglück zü handen gat  
 11 Syn sün Thobias all zyt lert  
 12 Das er an wysen ratt sich kert /  
 13 Dar vmb das nit volgt güttem rott  
 14 Vnd den veracht die hußfrow Loth  
 15 Wart sie geplagt von gott dar von  
 16 Vnd müst do zü eym zeichen ston /  
 17 Do Roboam nit volgen wolt  
 18 Den alten wysen / als er solt  
 19 Vnd volgt den narren / do verlor  
 20 Er zehen gschlecht / vnd bleib eyn dor /  
 21 Hett Nabuchodonosor Daniel ghört  
 22 Er wer nit jnn eyn thier verkört  
 23 Machabeus der sterckest man  
 24 Der vil groß tugent hat getan  
 25 Hett er gefolget Jorams rott  
 26 Er wer nit so erschlagen dot /  
 27 Wer allzyt volgt sym eygnen houbt  
 28 Vnd gütem rott nit folgt vnd gloubt  
 29 Der acht vff glück vnd heyl gantz nüt  
 30 Vnd will verderben ee dann zytt  
 31 Eyn fründes rott nyeman veracht  
 32 Wo vil råt sint / ist glück vnd macht  
 33 Achitofel sich selber dot  
 34 Das Saul nitt volget synem rott